

約章成案匯覽

第一函
九冊

約

來

中

章

歷

篇

江蘇工業學院圖書館
藏書章

成

益
見



爪洋務局纂輯

上海點石齋承印

約章成案匯覽序

公法家之言曰凡一國之法律必有立法者以裁制之惟國與國交際之法律則無人能擅立法之權故居今日國際法之主位者莫如條約蓋操縱離合之故成敗得失之林於是乎在彼東西各國法律專家童而習之皓首而不輟而吾士大夫眇所究心其何以懲前毖後乎自北洋有彙纂類編之刻桐鄉勞氏輯為纂要湘中又賡續而廓大之為分類輯要一書世之言交涉者賴焉顧其書止於己亥距今又六年矣時局日新人事遷貿錯綜變化月異而歲不同有倍蓰於己亥以前者闕而莫述來者何觀爰屬顏韻伯觀察踵湘刻之後續纂成案都為是編蛻故而存新訂訛而補闕商榷體例增益圖表

旁註年月以便考證上提綱要以省繙帑蓋不獨致力之勤其用心亦良苦焉書既成命曰約章成案匯覽將以諗世之言交涉者俾資觀覽且議嗣後歲輯一冊仿英國藍皮書之所為方今環球大通世變日亟詰戎練武之實與講信脩睦之文二者相為表裏前車已逝來軫方遘杜漸防微陽開陰闔詎復有常轍之可循雖然語不云乎不習為吏視已成事又曰不知來視諸往誠由此而進讀外交諸史以蘄登乎法學家之堂而嶠其哉則是編其猶大輅之椎輪也夫

光緒三十有一年歲在乙巳夏六月項城袁世凱序

約章成案匯覽序

國於大地皆必有其自有之權利義務他國不得損害而干涉之要
必藉法律以為之衛國家乃得依據以互保其安全國際法即緣之
而起條約者國與國自表其權利義務公俾之以為信据者也凡研
究國際法必先審吾國勢何如國力何如始足以驗吾權利義務之
完闕故紬條約之文可以覘其國力範圍之所至條約涵義至博而
求其合於國際公法者則蘄兩國之平和使引之彌長以互伸其權
利平和之通義必使智識物產相為挹注兩利並進而權利義務皆
足以相消此五洲進國所為善用其通濬已國之利以增其光寵也
夫交通者天地自然之用也界山河以成國無論別以種族別以地

勢其由漸而演進者則必有其特異之端以自顯於他國天然之物
質與人擇之精神相蛻而成進化地運之周轉與人事之接觸相會
而成交通當其塞也地勢閼之人謀閼之及其通則危嶺不足以爲
障重瀛不足以爲阻蓋交通者天地自然之用也瀏觀往蹟恆匪一
涂而通之之勢自動與被動又畫然而異自動者其勢順其獲利益
均被動者其勢逆乃轉視其國力之盈絀以爲衡而不必純歸於兩
利故洞明時局者沈幾以觀其變而恆以敏銳相先者有由來也研
究本國之國際法必先探其條約之起原實驗吾權利義務之關係
若何第其易約年限以較其銷滅與廢續者之孰利乃得以量吾國
力而對待之則條約者實據已然之權限以謀將來利益之準繩也

交通逾廣條約滋繁欲使通國瞭然於自有之權利義務各盡吾力
以保衛之則宜有專書以為之宿復慮其漫衍有排比鈎稽者以盾
其後則弗勞而可穫項城宮保深知其故病前人編輯或有漏略無
以收挈領頓裘之助乃成茲編以告通國連平顏韻伯觀察實理董
之韻伯治斯業最勤訂補譌闕損益條例釐然而各當又北洋當交
涉之衝文牘成典秩然備具復躬詣外務部饜其蒐討考訂加詳難
煩舉要洵足以研究國際法者所依據求所以保權利義務之安全
者吾知其必有助也抑据已然之權限以謀將來之利益者能獨無
裨耶

光緒三十有一年歲在乙巳七月既望長沙張百熙序

約章成案匯覽序

古今天下之趨勢何歸乎一歸於法治而已矣生民之初爭攘噬齧一純任天行之天下有人治者起鋤其豪暴卹其寡弱立為典章條教於是國家之法制興焉國與國相遇其勢又不能無爭爭則天行復起而人治悉歸于頽廢憂時者恫之於是創為萬國通行之公法舉強弱小大萬有不齊之邦域一以造物之公義裁之使國際往來一若家人之相與恩怨報施各有其分不相凌越合五洲萬族為大同之世宙俾各極治功所至熄天行酷烈之威績雖未大著其意可謂深美矣蓋法治之效至是而始為致極者也中國自開闢以來雄據東方大陸文物聲明光被海內外四裔賓服稽首內向歷三四千

年自封內割據之外未有鄰國並立之事其間西方大國唯羅馬號稱皇帝勢盛而祚永東西相望海山邈絕欲接無繇日耳曼民族既分王羅馬故土荷蘭西班牙葡萄牙之屬益務遠出拓地於是兩洲聲息胥響通矣輪舶制興萬里鄰接歐人足跡徇徧涉非澳南北美諸洲乃鱗萃麋集乎華海世運之開有天意焉非人力也吾國開關之始士大夫狃於聞見其視梯航而至者莫非納款貢獻之列交接之儀輒不屑以平等相待外人以公法為辭謝不肯應其後屢經懲艾不得已曲徇其請割棄利益欲返求公法以自全而已無及矣故國際共享之利我獨屏不得與而中外交涉之歷史大抵失敗之蹟焉勢之所趨豈盡謀謨之失哉今尺寸之儒稍涉西人學說輒執條

約之文較短量長以肆其譏議此特事後之智耳使當風氣未開之先驟接髻鬟梟睨之倫眩之以膠盞之文承敗衄之後其果能從容擘畫參稽得失使釐然各當遠勝於今所為邪莊子曰迹履之所出而迹非履也日本初訂外約其規則盡與吾同邇來壹意維新國制軍政人才咸蒸蒸日上西方先進之國莫不改容起敬遂罷居留地制度及領事裁判之權而吾國議加稅則及收回治外法權之論亦屢經列邦允許顯列於條文士君子苟能淬厲圖功為

國家修政經武使聲光蔚然視列彊而無媿色鯢鵬一息萬里向之施尉羅於藪澤者曾何足以控搏公法者固視國勢強弱以為轉移者也況條章規約之因時制宜者乎然則有志之士欲究明中外之

勢以裨補 國家者其為術固自有在毋徒訾議舊約為也舊纂約章苦無完備之本士驤在京師時值兵燹之餘於外部檔冊防護甚至方議採輯刊布卒卒未果其後備官畿輔請之 項城宮保以顏韵伯觀察總其事設局兩載卒歲功役國家近百年來交涉大端首尾略備得失之林成敗之跡昭然在是矣謹而持之以謀其便化而裁之以會其通異日

國運之振興必有賴於是者今行省方立法政學堂詔多士以法理之學茲編豈非重要之一教科也哉余嘉觀察編輯之精勤而成書之速也乃為之序以歸之

光緒三十有一年歲次乙巳冬十月楊士驤序

約章成案匯覽

例言

一我國辦理交涉有約章成案猶英之有藍皮書法之有黃皮書
美之有紅皮書也自互市以來約章通行本曰彙纂曰類編均
創始於北洋若勞氏纂要則專為內地交涉而設嗣湖南有分
類輯要之作計截至光緒己亥年實為最近刊本己亥以後尚
無繼者

項城宮保慮交涉益繁思預籌因應爰命世清踵輯要之後續
纂是編所有體例門類或斟酌損益不無變通或因時制宜多
有更易起康熙己巳迄光緒甲辰萃二百餘年交涉脩一完善

全書嗣後年出一本體仿海關貿易冊式源源接續永以為例俾講求外交者有所依據焉

一彙纂類編輯要諸書將條約一項皆按依門類割裂分編推原其故大都因易於檢查而致然不便之處却有數端大凡兩國訂約彼此必有命意所在其注重之處不厭反覆求詳或此款已見而彼款重言申明者或前款語意未盡後款又復聲敘者層見疊出比比皆是合觀全文則語氣聯絡強分條款則詞意不完况一款之中每有包括數門者若一門獨存未免掛一漏萬儻各門兼收又慮重複繁瑣其尤要者約中往往有無類可歸之款為全約極要關鍵觀輯要諸書竟爾刪去夫交涉一道

首重條約雖一字亦不能刪除矧一款乎是編鑒於以上種種未敢曲為附和擬將條約章程成案分為甲乙二篇甲篇全載條約以國分卷按立約年月先後為次序所有門類均註於分款首端每頁偏傍重復加註猶恐查閱不易復於每卷後附檢查門類表按類查款極為簡便乙篇則全載章程成案仍以門類分卷庶幾尋繹有次開卷了然

一是編門類多有更正增改輯要之處如游學游歷類輯要均附傳教門此大誤也現在內而京師外而各省遣派出洋遊學者日增月盛是必另立游學門方足以正體例若游歷厥有二端大凡我國派赴各國游歷者為考求製造調查學校居多數至

西人來中國游歷者或周覽山川風土或研究農工商礦半屬
彼國輿地會派出則游歷一門實近於學於教務毫不相涉不
得附於傳教此理甚明又此次各國商約有改訂通用錢幣一
款是圓法一門必須增入其餘如聘募附入傭工之後路礦電
綫混為一門郵政賽會僅附卷末均屬眉目不清今將游學游
歷各為一門聘募招工各為一門傭役附於招工增入圓法一
門附以各國幣制若路若礦若郵電直分作三門賽會又另闢
一門加稅免釐洋藥並附於通商門或視前書較為妥協

一是編門類次序大概均依輯要門為總目類為子目以類附門
有門無類者聽綜而計之分門者二十分類者三十一甲篇條

約為卷凡十乙篇章程成案為卷凡四十二詳披總目便知梗概

一是編條約一項謹遵

外務部頒行原本不敢增損一字其照會附件所以補條約未詳者今均依原本列於條約之次以備互相印證

一是編章程成案均從

外務部暨

北洋檔案錄出舊者刪之廢者棄之統計仍原書者十之三增補新案者十之七舉凡歷年中外交涉要政於斯略備其私家著述概不纂入以符官書體制